

Nunatsinni Angajoqqaat Oqartussaaffiisa annertunerulernissaat ersarinnerulernissaallu anguniarlugu "Angajoqqaat Peqatigiiffiannik" taaneqartumik Atuarfitsialammi inatsisip § 40-41-42-p Atuarfiup siulersuisuinut inatsimmut ilanngussinissaq pillugu apeqquteqaat aallaavigalugu oqallisigineqarnissaannik siunnersuut.

(Inatsisartunut ilaasortaq, Ruth Heilmann Siumut)

Akissuteqaat

(Ilinniartitaanermut, Ilisimatusarnermut Nunanullu Avannarternut Suleqateqarnermut Naalakkersuisoq)

Inatsisartunut ilaasortaq Ruth Heilmann, Siumut apeqquteqaat aallaavigalugu oqallinnermi siunnersuuteqarpoq meeqqat atuarfiat pillugu peqqussummi "Angajoqqaat Peqatigiiffiannik" taaneqartumik aalajangersakkani ilanngussisoqassasoq.

Naalakkersuisut isumaqarput inatsisiliorneq atorlugu innuttaasut pinngitsaolineqarsinnaanngitsut peqatigiiffimmik aalajangersimasumik anguniagalimmik siunertalimmilluunniit pilersitseqquullugit.

Peqatigiiffeqarnikkut kiffaanngissuseq Europami inuit pisinnaatitaaffi pillugit ataatsimiititaliarsuaq (Den Europæiske Menneskerettighedskommission) naapertorlugu anguniakkat assigiinngitsut anguniarlugit peqatigiiffeqarneq **naalagaaffimmit akuleruffigineqanngitsumik** innuttaasut tamat katerissinnaanermut periarfissaattut paasineqassaaq. Peqatigiiffiup qanoq paasineqarsinnaaneranut nassuiaat aammavoq www.menneskeret.dk -li malillugu peqatigiiffik tassunga atatillugu tassaavoq "qanoluunniit ikkaluarpat nammineq kajumissutsimik tunngaveqartumik inuit arlaliullutik ataatsimoorussaminnik peqatigiiffiliutissaqartut kateriffigisaat, ataatsimoorussamik siunertaqartoq."

Taamatut oqareerlunga **nammineq kajumissuseq tunngavigalugu** angajoqqaanut meeqqat atuarfianni meeqqamik atuarnerannut atugarissaarnerannullu soqutigisaqartunut peqatigiiffiliornissamik kattuffiliornissamilluunniit isuma taperserlugu oqaatigerusuppara. Siunnersuuteqartoq isumaqatigaara tulluartuussasoq meeqqat atuarfiat pillugu apeqqutini pingaarutilinni soorlu siunissami isummersortarnissani, inerisaanissani imaluunniit inatsisiliorniarerni angajoqqaat soqutigisaannik aallussisinnaasumik suliniaqatigiiffiliortoqartariaqaraluartoq.

Kissaat taanna siusinnerusukkut nuna tamakkerlugu atuarfinni siulersuisunut ilaasortanut pikkorissarnerni saqqummiunneqartareersimavoq piviusunngortinnejartarsimanani angajoqqaanik namminneq kajumissutsiminnik tunngavilimmik sulerusuttunik suliassamik aallartitserusuttoqartarsimannngimmat. Naalakkersuisut taamaammat angajoqqaat peqatigiiffissaannik kajumissuseq naapertorlugu suliniuteqarusuttut tamarluinnaasa tikilluaqqujumavaat tapersorsorusullugillu meeqqatta atuarnerat atugarissaarnerallu pillugu siunissami oqallinnernut pitsangorsaaqataasinjaassammat.

Taamatut oqaaseqarlunga Inatsisartut oqallilluarnissaannik kissaappakka.